

心有爭則有尤矣

右第七章

持而盈之不如其已揣而銳之不可長保

持奉之也已止也揣捶之也此章謂道不欲盈而又以銳爲比言槃水者不可以盈盈之則易至於溢不如已之而不使盈也遂言捶錐鋒者不可以銳銳之則易至於挫而不可長保其銳矣盈之則不長保其盈亦猶是也○易以豉切金玉滿堂莫之能守富貴而驕自遺其咎功名遂身退天之道

世有金玉滿堂莫能守者何哉蓋因富貴而驕自遺其咎耳

道藏輯要

道德真經註

九

心集十

是以功名遂而身退乃合於天之道此言不可盈之也金玉謂富驕謂盈自遺謂由己所致非由乎人咎謂不能守之咎功成名遂謂貴身退謂不盈之者天之道虛而不盈故四時之序成功者去前言富後言貴而富貴二字在中間一句通貫前後惟貴迺富則富之中有貴既貴必富則貴之中有富富貴二者相須而有故驕盈而不保其富是卽不保其貴也身退不盈而長保其貴是亦長保其富也

右第八章

載營魄抱一能無離乎專氣致柔能嬰兒乎滌除玄覽能無疵乎